

Bahmaj Yauzcuz Swciyen Gawjhengz Gaiq Daihsam Gangj Gojgaeq Vahcuengh Doxdax

巴马瑶族自治县举行第三届小学生讲壮语故事比赛

Vihliux dem' ak naengzlig gangjavah Vahcuengh, beizyangj gyoengq hagseng gyaetz Sawcuengh. 6 nyied 27 hauh, Bahmaj Yauzcuz Swciyen youq Bahmaj Cin Banzyangz Sizyen Siujyoz gawjhengz daengx yienh gaiq daihsam siujhagseng gangj gojgaeq Vahcuengh doxdax. Youq mboengq doxdax gaxgonq, sien hawj gak ban baij senjsouj camgya doxdax, doeklaeng, aeu 10 boux ak haenx daeuj guh gezsai. Doxdax hengz itdaengj ciengj boux ndeu, ngeihdaengj ciengj song boux, samdaengj ciengj sam boux,

hawj yen gyauyuzgiz daj yienh minzcuz cunghyoz genj gyoengq lauxsae conhyez Sawcuengh ak haenx daeuj dang bouxbingzveij. Baez doxdax neix, hingsik lai yiengh, miz boux dandog gangj, miz song vunz doiq gangj, miz lai boux caez gangj; neiyungz fungfouq mizyinx, miz gojgaeq gaeuq, miz gojgaeq moq. 10 boux senjsouj ginggvaq haenqrengz doxbingq, doeklaeng Cinz Lingzvei doengzhag aeu ndaej daih-it mingz.

(Moz Sangvwnz/莫尚文)



▲ Dak hagseng neix gangj roizaea raeuzradad.



▲ Ndown youq gwnz daiz, boux hagseng gangj gojgaeq neix caemh simdingh cwdcud.



▲ Boux doengzhag aeundaej ciengj haenx caeuq lauxsae, lingjdauj ingjsiengq louzniemh.

Cauhbingz: Daihagseng Sujgyaj Daeuj Mbanj Yauzcuz Son Saw

昭平:大学生党员暑期支教进瑶乡

7 nyied 6 hauh, gyoengq boux daihagseng dangjyenz Vaznanz Nungzyez Dayoz Cuhgyangh Yozyen, daeuj daengz Cauhbingz Yen Senhvez Yauzcuz Yangh Mauzbingz Cunh Siujyoz guh muzlienhang dangj singq hozdung, soengq 2 daiz dennauj caeuq buek doxgaiq yungh hagsib banhgoeng ndeu hawj hagdangz. Daihagseng dangjyenz youq Mauzbingz Siujyoz son saw aen singhgiz ndeu, cujyau son gyoengq hagseng hag dennauj, Yinghyij caeuq suyoz.

(Liuz Feih Loz Ciyungj/刘飞 罗智勇)



▲ Boux daihagseng cingq son hagseng hag dennauj.

Yungzsuij: Myauzcuz Beixnuengx Angqhoh "Ciet Cimz Moq"

融水:苗家欢度“新禾节”

Moix bi daengz ngoenz liggaeuq loeg nyied coloeg, Yungzsuij Myauzcuz Swciyen gyoengq beixnuengx Myauzcuz couh daenj buhmoq, comz daengz Yanghfwnj Yangh Mbanjmauzbingz, guh boq venz, diuq foux-caijdangz, max doxdik, roeg doxdot, dox gonhraemx, beij youzraemx daengj hozdung, angqhoh "ciet cimz moq".

"Ciet cimz moq" dwg ngoenzciyet angqhoh fungsou Myauzcuz, gij daegdiemj de dwg "cimz moq": Gyoengqvunz bae reih mbaet aeu haeuxyangz ngamq cug haenx ma, caeuq haeuxcid naengj cug le gyuk baenz ceiz rangfwdfwd, heuhguh haeuxmoq; daj ndaw dah gaeb byaleix ma oenq, guh baenz byaoenq, heuhguh byamoq; daj gwnz bya dwk ndaej duzroeg, aeu noh duzroeg caeuq byaekmieq, duhnoh cawj baenz souh, heuhguh byaekmoq; mehmbwk Myauzcuz guh gij laeuj hawj vwnzlai ngoenzciyet gwn haenx, heuhguh laeujmoq. Daengz ngoenzciyet banhaet, moix ranz dawz gijgwn neix daeuj baij gwnzdaiz, vunzlai caezgya gwn, angqhoh ngoenzciyet.



▲ Mehmbwk Myauzcuz niuj rwz bouxhek le caiq gingq laeuj.



▲ Haeuxcid Myauzcuz ndeigwn lai.

Yungzanh Makit Ndaej Fungsou

融安葡萄喜获丰收



Yungzanh "Nungzcangz Ranz Cinz" dwg aen gyahdingz nungzcangz daih' it Yungzanh Yen, aen nungzcangz neix, doenggvaq bau diegreih, ndaem le 200 moux reih song geiqciyet makit, makit youq seizhah caeuq seizdoeng ndaej sou, moix moux ndaej sou 3000 goenggaen baedauq. "Ranz Cinz Nungzcangz" giva doenggvaq gohyoz dajndaem, daiqdoengh vunzlai ndaem song geiqciyet makit demsou baenzfouq.

(Lij Binh)

◀ 7 nyied 11 hauh, nungzminz youq ndaw "Nungzcangz Ranz Cinz" mbaet makit.